


Э.И.ПОЛЯКОВА

Олісны-вылісны шыпасьяс






Э.И.Полякова

978-5-7800-1612-5

Олісны-вылісны шыпасьяс



*Серпасалмысь
Елена Григорьян*



П 54 Полякова Э.И.

Олісны-вылісны шыпасъяс. – Сыктывкар:

«Эскӧм» издательство, 2007. – 80 л.б.

Тайӧ небӧгсӧ дасьтӧма бать-мамлы, ичӧт школаын велӧдысьлы да детсадын уджалысьлы отсӧг вылӧ. Око тапырысь чужан кыв велӧдӧм могысь небӧгас пыртӧма шыпасъяс йылысь нюмсера висътьяс. Шыпас грездын олысьяс йылысь висътьяс лыддигӧн челядь тӧдмасысны коми шыясӧн да шыпасъясӧн. Небӧгӧ пыртӧм висътьясыс отсаласны сӧвмӧдны челядьлысь чужан кыв вылын сӧрнисӧ, озырмӧдны налысь кывворсӧ, паськӧдны матигӧгӧрса олӧм йылысь тӧдӧмлун. Серпасъяссӧ уна рӧма карандашӧн мичмӧдӧмыс сетас позянлун сӧвмӧдны кагалысь ки да чунъяс, бурджыка дасьтысьны первой классын гижан уджъяс вӧчӧм кежлӧ.

© Полякова Э.И., 2007

© Григорян Е.П., 2007

© Издательство «Эскӧм», 2007

Дона велӧдысьяс, бать-мам да пӧч-пӧль!

Тайӧ небӧгас вӧзъя шыпасъяс йылысь висетьяс. Морт сяма шыпасъяс олӧны-вылӧны Шыпас грездын. Найӧ ӕртасьӧны ӧтамӧдныскӧд да коми йӧзкӧд. Быд шыпаслӧн аслас сям да оланног. Тӕрмасътӧг лыддьӧй кагайдлы шыпас йылысь висетьяссӧ. Лыддьӧм бӧрас сӕрнитыштӧй сыкӧд шыпаслӧн вӧчӧмтор йылысь. Отсалӧй донъявны шыпаслысь вӧчӧмторсӧ да оланногсӧ, сылысь сямсӧ да аслыспӧлӧслунсӧ. Гӧгӧрвоӧдӧй тӧдтӧм кывъяслысь вежӧртассӧ, сетӧй юалӧмъяс, тшӧктӧй ас кывйӧн висетьавны лоӧмтор йылысь.

Быд лист бок вылын серпасалӧма висетьлысь кутшӧмкӧ юкӧн. Корӧй висетьавны серпас серти Шыпас грездса олысьяс йылысь.


Лыддьӧм да сӕрнитыштӧм бӧрын сетӧй кагайдлы карандаш. Небӧгын петкӧдлӧм чутъяс серти медым сийӧ гижас – серпасалас ыджыд да ичӧт шыпасъяс. Ӑн вунӧдӧй юавны тӧдса шыпаслысь нимсӧ. Вермас тӧян каганыд лоны художникӧн: уна рӧма карандашӧн мичмӧдас серпас, мыйкӧ рисуйтас. Шуам, «А» шыпас йылысь лыддигӧн бурджык петкӧдлыны анькытш, акань, арбуз.

Серпас улас сетӧма гижӧд. Позьӧ нӧжӧйӧ лыддыны гижӧдсӧ, а кагайд мед гижӧдсьяс коряс тӧдса шыпасъяс.

Шыпасъяс йылысь тӧдӧмлунъяс, сям да вежӧр сӧвмӧдӧм могысь уна сикас уджъяс отсаласны первой классын бурджыка гӧгӧрвоны шы да шыпаслысь аслыспӧлӧслунсӧ.

Быд бурсӧ тӧянлы тӧдӧмлунӧ писькӧдчӧмын да мывкыд сӧвмӧдӧмын.

Небӧг дасьтысь



«А» шыпас пуктiс лапкор Агньюшлы доймõм кокас.



А а шыпас


Өти коми грездын оліс-выліс *авъя ань* – А шыпас. Сійө мөвпаліс *асшөр* олөм йылысь, көсйис төдмавны, кызди олөны *анбурса* мукөд шыпас. Өтчыд *аръявыв* А шыпас мөдөдчис *анькытш* му пөлөн Шыпас грездө.

А шыпас мунигмозыс *азыма* сөйис *анькытш*. Друг кыліс кодлөнкө бөрдөм: «А-а-а!» Тайө ичөт *Агнюша* усьөма да дойдөма коксө. Ыджыдджык *Аннуш* чойыс сійөс бурөдө.

А шыпас матыстчис кык чой дорө, төдмасис накөд. Туй бокысь нетшыштис лапкор да пуктис *Агнюшлы* доймөм кокас. Пөся *аттьөалисны* А шыпасөс кык чой.

– *Аддысьлытөдз, Аннуш да Агнюша!*





О - о - о! Сы мында вотомыд!



О О шыпас

О шыпас босьтис чуман да мөдөдчис вөрө: гашкө, кутшөмкө вотос сурьштас. *Очсалигтыр* шыпас осьлалис вөрса *ордымөд*. Воис шор. Шор боксьыс шыпас казялис *оз*. Сярвидзө гөрд! Медводдза тусьсө пыр жө вомас суйис. *Ок* и чөскыд жө нин! Тусьөн-тусьөн өктис чуман тыр чөскыд вотөстө.


Гортас мунігмоз кодлыськө сёрни кылис. О шыпаслы *окота* лои төдмасьны вотчысьяскөд.

- Видза *олан!* – шыпасис О шыпас. – Вай төдмасьмөй.
- Видза *олан!* – вочавидзис нывка.
- Тэнө кыдзи шуоны? – көсьис төдны шыпас.
- Менө шуоны *Оляөн, овөй* – *Осипова*.

Оля петкөдліс мамыслы вотөсөн тырөм чумансө.

– *О-о!* Сы мында вотөмыд... Молодеч! Кутшөм тэ зіль, менам медбур *отсасьысь!* – *ошкыштіс* нывсө мамыс. – *Олюшөй* менам, *олан* гажөй!

О шыпас *ошкана* видзөдліс *Оля* вылө. Туйөд осьлалігөн висьталіс Шыпас грездын *олысь* шыпас-ёртъяс йылысь. *Олялы* зэв *окота* лои мунны школаө да бурджыка төдмавны шыпасъяс йылысь.



A-y! A-y!



У У шыпас


Угдым юсянь неылын Ёсиплөн дасьтёма лэч туй. Ёсип дядь Улляна нылыскөд мөдөдчисны пув вотны. Ю пөлөн мунігөн бура кылісны *уткальсь* герчкөмсө. Видз вылысь вотісны бурдөдчан *уразнөй* турун. Со и паськыд гулыд яг. Сярвидзысь гырысь пемыдгөрд пувсө вотыштөм бөрын Ёсип муніс видлыны лэч туйсө.

Тайө кадө *уджач* У шыпас *увтасінын* төв кежлө заптіс тшак. Сійө чукөртіс гөрд гоб, *уртшак* да пысавліс пу *увгясө*. Сэсся кыскаліс кос *увгяс* да вөчис вель ыджыд чукөр.

Кыліс нывкалөн горөдөм: «Ау – ау!» У шыпас матыстчис Улляна дорө. «Удж да мог!» – шысис У шыпас.

У шыпас висьталіс Шыпас грездын олысьяскөд өтувья олөм йылысь. «Ау – ау!» – горөдіс гора гөлөса У шыпас. Кыліс Ёсип дядьлөн воча горөдөм.





И - и - и!



И И шыпас

Воис нянь *идралан* кад. Шыпас грездса ёртъяс ыстісны **И** шыпасёс *идла*. Шыпас мөдөдчис *Изъёльлань*. *Изсянь изйё* чеччалөмөн вуджис ёль. Неылын кыліны шыяс: «*И-и-и!*» Шыпас видзөдліс гөгөрбок: ёль бокас лэчыда тивзіс кузь ныра *истан*. Сылөн съөд бөжыс еджыд визьяса, кынөм улыс тшөтш жө еджыд. Ёль боксыс казяліс ныла-зонмаёс.

Иван да *Ира* олісны *Изъёль грездын*. Найө *ичөтсянь* радейтісны удж: гожөмбыд отсасисны бать-мамныслы, да и ас бөрсяныс налөн *идөрыс* тырмө. Талун батыскөд *индөминысь* вундісны нянь. **И** шыпас отсыштіс налы. Куимнанныс вайисны грездө *идзас* да *идзасалисны* гидсө. Сэсся *изісны ид*. Туйө шыпаслы сетісны *ид* нянь да *ид* пызь.

- Аттё отсөгсьыд, миян радейтана шыпас! Бур туй тэныд!
- Став бурсө тіянлы, *Ира* да *Иван*! Видза колянныд!



Чута і зіля весаліс мазі поз да босьтіс дозйō ма.



1 шыпас


Енэжын пөртмасис ярьюгыд *шонди*. *Чута i* идзас шапкаасис да мөдөдчис корсьны ма.

Видз вылын быдмө уна рөма мича дзоридз. Насянь өвтө чөскыд көрөн. *Кылис зияслөн зиньгөмыс*. Шыпас гөгөрвоис: матын *зи* поз. Сийө *зи* поз *динас* сутшкис кузь *зиб*, мед пө ветлысь-мунысьыс оз веськав чушкысьяс позйө.

Регыдөн *казялис мазяслысь* лэбалөмсө. Шыпаслы воча *локтис мазі* видзысь Ивө. *Чута i* да Ивө *зия весалисны мазі* позъяс, *босьтисны* дозйө ма.

– Бур отсасьысьлы чөскыд ма! – шуис Ивө да мыччис шыпаслы ма доз.





Ы - Ы - Ы!



Ы Ы шыпас

Шыпас грездса уджач олысьяс видзисны гортса пемөсьясөс. **Ы** шыпас радейтис видзны *ыжгъясөс*.

Гожся лунö **Ы** шыпас вөтліс *ыжгъясө* йирсыны. *Ывлаыс* жар. Син водзас сувтис *ышөдана* серпас. *Ылын* шыльквидзис паськыд *ыб*. Көнкө сыліс *ыбкай*. Йирсян видз пөлөн быдмис ыжнён. Шыпас чөсмасьштис *ыжнёнён*. *Ылісянь* кыліс валөн *ызгём* шы. *Ыжгъяс* шорысь юисны ва. *Ыж* видзысьлөн тшөтш жө косьмис горшыс.

Тарас водз асывсянь нин *ытшкис*. Пажын кадö пуксис шойчыштны *ыркыдинö*. Буретш тайö каднас **Ы** шыпас матыстчис *ытшкысь* дорö.


– Лок кöдзыд *ырöшсö* юышт, – корис Тарас шыпасөс да мыччис сылы тuis.

Ы шыпас *ырситис* *ырöшсö* да *ыкнитис*: «**Ы-ы-ы!** Кутшөм кöдзыд!» Сэсся гөлөс *ыдждөдөмөн* содтис: «Ёна жө и чөскыд тайö юанторйыд горш косьмигад!»

Тарас ошкана видзөдіс сямөдысь вөчөм доз вылас.

– Жар луннад сямөдысь вөчөм тuisад юанторйыд оз шонав, пыр кöдзыд. Тайö дозмуко ми пыр аскөд босьтлам туйö, – сёрнитис Тарас.

– А ме төдмалі, мыйла дозмукыслы сетлөмаөсь тuis ним, – нюмгөвтис **Ы** шыпас, атгьöалис Тарасөс чөскыд *ырöшысь* да водзö вөтліс *ыжгъясө*.



Эжва юй, шондibanой!



Э Э шыпас

Шыпас грездса олысьясид гожом чож заптысьоны төв кежлад. Найо зэв ки *этшаось* да уджачось. Талун Э шыпас мододчис *эжмом* муяс бокті *Эжва* ю дорө *эжөрла*. *Эжөраинсьыд эбөса* шыпасыд регыд кадөн ытшкис нөб тыр *эжөр* да пуксис вадорө шойччыштны.

Шыпас водзын сувтіс мича серпас. Ылын-ылын тыдаліс *эжтас*. Ю бокас шылкідзисны видзьяс. Юын уна дзирдъясөн ворсіс шонді. Ва *эжыс* шылъыд. Сөдз ваын гыбыштіс *эзысь* сьөма чери.

Көнкө кыліс мыла сьыланкыв:

Эжва юй, шондібаной –
Коми мулөн сьөлөмшөр,
Мам кодь овывлан тэ шаньон,
Видзөдласыд абу скөр.

Ас кежысь шыпас мөвпаліс: «*Эк, Эжва!* Уна нэм чож аслад выннад дон босьттөг отсалан коми йөзлы. Аттьө тэныд, *Эжва!* Медым тэнад мичлуныд некор оз чусмы! Медым выныд некор оз чин!»

Вадорса *эжа* вылын куйлісны гожйөдчысьяс. «*Э-э-э!* Ме суна!» – горөдіс купайтчысь *Эдик Эммалы*.

Вадорысь гортө кайигөн *Эмма да Эдик* сүөдіны Э шыпасөс.

– Вай отсышта нөбтө нуны, – *эскана* корис *Эдик* да босьтіс шыпаслысь нөбсө.

Мунігкості шыпас варовытыштіс челядькөд. *Эдик да Эмма* воөмаось юркарысь пөрысь пөч-пөльыс дорө отсасыштны. *Эштан-дор* котөртлывлөны *Эжва* ю дорө. Талун найо мудйөмаось картупель, а уджсө помалөм бөрын мудзсө веськөдны лэччөмаось вадорө.

Шыпаслы сьөлөм вылас воис чоя-вокалөн *этшыс*. Сёрниысь гөгөрвоис: некор оз *элясьны* олөм вылө.

– Ыджыд аттьө! Волөй миян Шыпас грездө гөсьтитны, – янсөд-чигөн корис чоя-вокаөс Э шыпас.



Ок и чөскыд жө нин өмидзыд!




Шыпас грездын оліс-выліс **Ö** нима шыпас. Тайö шыпасыс паны-дасьлө сөмын коми кывъясын: *öшкамöшка, öдзөс, öгыр, öш*. **О** шыпасыс торъялөм могыс юр вылас кык чута шапка новлө. *Обыч-ыс* тайö шыпасыслөн вөлі рам. **Ö** шыпасыд радейтис *öти öтка* пөчөс, грездас *Öнись* тьоткаөн шуоны. *Öткөнтө* овны сылы сьөкыд. *Öчкитөг* омөля нин аддзө. **Ö** шыпас воливліс пөчө дорө отсасыштны.

Грезд помас сулаліс *Öнись* тьоткалөн кык жыръя керкаыс. Оз өд прөста шуны: *öтувзя* уджын быдтор кокниджык вөчны. Керкасө *öтвылысь* став рөдвужыс лэптылөмаөсь. *Öтарладорас* гожйöны, а мөдарладорас төвйöны. Пөчө радпырысь восьтис керка *öдзөссө*: бур йөзыдлы пө керка *öдзөсыд* пыр восьса. *Öта-мөдкөд* пөся видзаасисны. *Öнись* тьотка гөсьтитөдіс шыпасөс мөс вөра йөлөн, нөкйөн, сөчөнөн да пувъя пирөгөн. Сэсся корис шыпасөс *өшинювса* юмов *өмидзөн* чөсмасыштны.

Ывлаын кыліс бакөстөм: мөсьяс локталісны йирсянінысь. Шыпас босьтис ньөр да *өдйöпырысь* шавксьөдіс шорлань. *Öдөбтөмөн* чеччыштис шор вомөн. Ытшкөмбөрса *өтава* вылын азыма йирсис *Öнись* тьоткалөн мөскыс да *өвадысь өвтчис* бөжнас.

– Мун гортө, Сюрук! – вөтліс мөскөс шыпас да *өддзөдіс өдсө*.



Иннук, на намыр!



Н Н шыпас

Шыпас грездын олісны согласнӧй шы петкӧдлысь шыпасъяс. Квайт шыпас овмӧдчисны ӧти судта квайт жыръя керкаӧ. Олісны *найӧ* ӧтсӧгласӧн, вермисны сёрнитны и чорыд, и *небыд* гӧлӧсӧн. Ӑти жырйӧ овмӧдчис **Н** *нима* шыпас. Сійӧ радейтіс лӧз да турунвиж рӧма паськӧм.

Ю дор *нӧрыс* вылын быдмис ӧтка пу. **Н** шыпасыдлы окота лои видзӧдлыны тайӧ пусӧ матысянджык. Видзӧдліс гӧгӧрбок: дзик коз пу кодъ жӧ тайӧ пуыс. Сэсся *нарошнӧ* кинас малыштіс лыссӧ да казяліс: коз лыс дорсыд тайӧ пуыслӧн лыскыс *небыдджык*. *Нем* виччысьтӧг пу дінӧ матыстчисны гора гӧлӧса **А** да **И** шыпасъяс. Найӧс суӧма *неминуца*: мачныс усьӧма ваӧ. **Н** шыпас суныштіс ваӧ да мыччис гора гӧлӧса шыпасъяслы мачсӧ. Сэсся куимнан шыпасыс *нимкодъпырыс* ворсыштісны мачӧн да пуксисны пу улӧ *недыр* кежлӧ шойчыштны.

Нӧрыс бокас кыліс нывкаяслӧн сёрни: «Иннук, на сёйышт чӧскыд вотӧссӧ! Тайӧ *намыр*». *Навӧлӧксянь надзӧникӧн* мунісны кык чой. Шыпасъяс тӧдмасисны *нывкаяскӧд*. *Нина* велӧдчӧ первой классын. Сійӧ тӧдӧ нин ӧкмыс шыпас: гласнӧй шы петкӧдлысь кӧкъямыс шыпас да согласнӧй шы петкӧдлысь **Н** шыпас. Сійӧ *на-яна* видзӧдліс шыпасъяс вылӧ:

– А ме тӧда тӧянлысь *нимнытӧ*: «нӧ», «и», «а». – Сэсся лыддис «*ниа*» кыв.

Нӧрыс вылын быдмӧ *ниа* пу. Сы вӧсна и гӧгралӧны тані **н**, **и**, **а** шыпасъяс.



Тайо сус пуыс гажодö да чöсмöдлö сиктса йöзöс.



С с шыпас

Н шыпаскөд өти керкаын оліс бур видзөдласа, небыд *сьөлөма*, веськыд *сёрниа*, *смоль сьөд* синма С шыпас. Сійө радейтіс *снимайтны* вөр-валысь мичлунсө.

– Вай бара ветлам *сус* пу дорад да чөсмасыштам кольнас, тшөтш и *снимайтам* мича пусө, – нуөдчис ичөт с Шыпас грезд помын *сулалысь* пу дорө.

Матыстчисны С да с шыпасъяс пу дорө, а тани У шыпас пукалө да *сөйө* чөскыд өрешки. С да с шыпасъяс тшөтш жө видлісны *сус* пулысь чөскыд өрешкисө. Пусянь неылын пукаліс *сера* дөрөма, кучик *сапөга* мужичөй. Тайө *сиктса* морт – *Семө Степан*. Сійө ветлөма вөрө *сюмөдла* да пуксыштөма шойччыштны. Со мый висьталіс *Семө Степаныд сус* пу йылысь.

Тайө пусө кыксө во *сайын* нин вайлөма Уралысь Көрнил нима морт. *Сылы* кажитчөма вына пуыс, пес кераланінысь локтігөн и босьтөма *сьөрсъис* ичөт пусө. Уна вонад пуыд *сөвмөма*-паськалөма. Унаысь вына бушков да чард-гым куснявлөмаөсь да чегъявлөмаөсь пулысь увъяссө. Но ён пуыд абу *сетчөма*, *садитөмторйыд* крепыда вужъясьөма муас. Со и өні *сус* пуыс гажөдө локтысь-мунысьөс да *сиктса* йөзөс.

Сёрнитыштөм бөрын *Степан* дядь да шыпасъяс мөдөдчисны кык *судта* керкалань. Потшөс бокас йирсис *Сюрук* нима мөс. Өшинь улас быдмис уна *сэтөр* куст. Град вылас *садитөма сёркни*, *свеклө*, капуста, редис, картупель. *Степан* дядь корис шыпасъясөс аслас вөчасян керкаас. Гөсьтъясөс шемөсмөдісны *сюмөдысь* вөчөм дозмукъяс да уна пөлөс чача, туисъяс.

Сюмөдысь да пуысь вөчөмторъяс видзөдөм бөрын С шыпас гөгөрвоис, кутшөм *сяма*-киподтуя вөлөма тайө мортыс. *Степан* козньналіс ыджыд С шыпаслы *сюмөдысь* вөчөм мича *сакарнича*, а ичөт с шыпаслы – пуысь вөчөм *сярган*. Пөся аттьөалисны бур мортөс шыпасъяс да мөдөдчисны асланыс оланінө.



Кутшом тэрыба вөрöны емъясыс Катъö тьöt кийн!



К К шыпас

Семö Степанкөд орчча *керкаын кырөм* бокас олö *Катьö* тьötка. На динö и воисны талун ыджыд **К** да ичöt к шыпасъяс. Ыджыд **К** шыпасыс зэв *кеслач, киподгя, ён ки-кока*. Грездса мукөд шыпас сийöс пыдди пуктöны бур *киподтуйсьыс*.


«*Каньöй* талун асывсянъыс нювсьö-мыссьö, – *Катьö* тьöt восьтис *калич*, петис шыпасъяслы паныд да *киасис*. – Менам радейтана шыпасъяс тай воисны! Локтöй, донаяс, пырöй!» *Катьö* тьöt гөститöдис *картупеля* шаньгаөн да *капустая* пирөгөн. Ичöt к шыпаслы *кажитчис* Васька *кань*. Шыпас пуксис *каньöс* серпасавны. Но *каньлы* эз дыр пукавсьы öти местаын, звиркнитис улöс вылысь, пышйис ывлаö да *кавшасис* пу вылö.

Керка дорас быдмис пашкыр *кыз* пу. Волөн быд *кадö* сийö зэв мича. *Кöть* и олöма нин *Катьö* тьötыд, овмөссьыс оз на лэччысь. А олан русö сылысь *кыпöдö* Васька *кань*. *Катьö* тьötка видзö *куим курөгöс*. Ылөдз *кылö* налөн *котсöмыс*: «*Кот-кот-кот!*»

Шыпасъяс тэрыба *куртыштисны керка* гөгöрсö да вайисны *куканьлы кос* турун. Ыджыд **К** шыпас *карнанөн катлис* ключ ва. Сэсся дзоньталис öдзöс игналан *каличсö* да *киссьöм* потшöссö.

Ичöt к шыпас *качайтчыштöм* бöрын матыстчис *кильчö* пос вылын пукалысь *Катьö* тьöt дорö. *Кутшöм* тэрыба сы *киын* вöрисны емъясыс! Сийö *кыис Кузьма* пиыслы вурун *кепысь*. *Катьö* тьöt висьталыштис *кысян* удж йылысь. Шыпас гөгöрвоис: вурун *кепысь кыöм* вылö *колö* уна *кад* да *кужанлун*.

Кадыд тай öдийö лэбö – рыт нин регыд. Аски *кежлö* *колис* уна *куртан* удж. Шыпасъяс *көсйысисны* *кольччыны* аскиöдз.



Мун йирсыны! Зорөдалөм кос туруннас
төвнас мөдан чөсмасыны...



М М шыпас

Мөд луннас водз асыв *Катьö* тьötка да *К* шыпас *мунисны* видз вылö куртны. Куртисны лёддзö да пуксисны ю бокö. Танi кыйсисны *Сима* да *Максим*. Эжва *мöдлапöлын* йирсисны *мöсгяс*.


Ылысянь кылис *мöслөн* бакöстөм. Видз вылын *мама-ныла* видзисны *мöсгясöс*. *Мöс* видзисьяслы отсасис бур *мывкыда*, *морттуя*, *мелi* видзöдласа, *мича* гөлöса *М* шыпас. Сийö кузьясь-кузь ньöрнас вöтлис турун зорöдлань пышйись *мöсгясöс*.

Йирсыштöм бöрын *мöсгяс* водисны шойччыны. *Марья* тьötка *мышнопсыс* кыскалис сёянтор. *М* шыпас да *мама-ныла* юисны *маа* чай, сёйисны-малкисны ас вотöм *мырпом*. Сёйыштöм бöрын *мыла* сьылисны «*Марьямоль*» сьыланкыв. Шыпас казялис *мамыслыс* ныв дiнас *мелiлунсö*: öд *Аннушыс* сылөн олöмас *меддонатор*. *Анна мамыскöд* олис, *майбыр*, *мог* ни шог тöдтöг, велöдчис первой классын. Шыпас *мыйкö мөвпалис*, сэсся *мөрччана* шуис *мамыслы*: *Аннуштö* пö колö *музыкальнöй* школаын велöдны сывны да ворсны.

Аннушлы шыпас висьталис аслас ёртгяс йылысь. Нывка тöдмалис öта-мöдныскöд ёртасьясь гора гөлöса шыпасгяс йылысь.

Көнкö ылын *муркйöдлис* гым. Ставөн *мöдöдчисны* гортö.





Зільджыка! Регыд зэрмас!



З З шыпас

Шыпас грездын квайт өшиня керкаын олісны С да З шыпасъяс. Найө ертасисны өта-мөдныскөд. Торъялісны сөмын гөлөснаныс: С шыпас сёрнитіс лөня, а З шыпас – гора гөлөса.


Мөдөдчисны кык шыпас вуграсьны. Вадорө вотөдз кыліс *зонкалөн* горзөм. Тайө Максим веськалөма *зі* позйө. Сы гөгөр бергалісны *зіяс* да *зіньгисны*: «З-з-з!»

Час-мөдөн кыйисны некымын ком да сын. Сы мында геб-ном петіс. Шыпасъяс гөгөрвоисны: *регыд зэрмас*.

Мөдлапөлас *Зөсим* аслас *Зина* нылыскөд турун чөвтисны. Аза көзаыслы төв кежлас турун ытшкыштөмаөсь. Сиктсаяс *Зөсимөс зумыд* оласаён да *запасливөн* шуөны: и пестө, и көрымтө, и тшак-вотөстө төв кежлад гожөм чөж *заптө*.

Кык шыпас казялісны: талань локтө съөдсьыс-съөд кымөр. «*Зільджыка!* – горөдіс З шыпас. – *Регыд зэрмас!*» Шыпасъяс *збодера* босьтчисны уджө. *Зөсим* зэв ёна радліс отсасьысьяслы, тэрыба чөвтис. Кык шыпас *зіля* ваялісны турун юрьяс. *Зинук* нылыс *зіля* курталіс юр пыдөссө. Став кос турунсө лои *зорөдалөма*. *Здук* мысти шливөбтіс-*зэрмис*. Нельнанныс дзевсисны *зорөд* улө.

– Аттьө тіянлы, шыпасъяс, отсөгсьыд. Миян Азуклы со өд кутшөм кос турун лои *зорөдалөма*. Гожөмнад кө мыйкө *заптыштан*, төвнад гажаджыка овсяс.



Со паляур – лэбалысь ур!



Р р шыпас


Шыпасъяслөн *радейтана* сёянтор – пувъя пирөг да юм. Тайö чöскыд сёянсö пуны-пöжавны колö пув. Ыджыд **Р** да ичöt **р** шыпасъяс *радпырысь ризöбөн* котöртисны пувла матысса *раскö*. Воис пувъяин. Кыкнанныс тэрыба вотчисны, *регыдъя* кадөн чуманъяс тырисны. *Рам* ичöt **р** шыпас *радысла* некытчö оз инась. Кыпыд *руа* шыпасъяс пуксисны яг *рöч* вылас шойччыштны. Көнкö кыліс *ракалөн* кравзöмыс: «Кар-кар!». Кыліс *ратшмунöм*, сэсся горөдöм: «Ур! Со ур!» Шыпасъяс дорті *ризöдіс* нывка. Сійö крукасис да усис нитш вылö. Пувйыд чумансьыс ставыс киссис. Ира ас вылас абу *рад*: урсö эз су, а пув тыра чуманыс куш лои.

Р шыпасъяс шарсйисны-вотисны пув *розъяс*, отсалісны Иралы тыртны чумансö вотöсөн. Матыстчис Иралөн мамыс: ур бөрся пö котралігөн öд верман и вошны вöрад.

– Со паляур! – *радпырысь* ыджыд **Р** индіс öти пусянь мөдö лэбысь ур вылö.

Ира казяліс урлысь да паляурлысь торъялөмсö. Паляурыслөн эм кучик. Пышйигас сійö паськөдö коксö, артмө лэбачлөн кодь борд.

Ира да шыпасъяс дыр на казътывлісны вöрын аддзысьлөмъяс йылысь.



Югд шондiй, шоньдсö
Вай жö тэ, вай!



шыпас

Вөлі өшым төлысь. Муыс тупкысьома еджыд *шебрасён*. Ывлаын *швачкакыліс* көдзыд, пөльтіс *швичкан* төв. Ичөт **Ш** шыпас пасьталіс *шоньд* пась, пеля *шапка*, *шарп* да *шавксьөдіс*-муніс сиктса *школа*. Кок улас дзуртыштіс *шавъялысь* лым. Со и *школа*. Пыранінас гижөма «Видза корам». *Шыпас* ставныскөд чолөмасис. Триньөбтіс звөнок, челядь котөртісны урок вылө. *Школаын* лои *шы* ни төв.

Ш шыпас пырис первой классө. «Анбур» урок вылын челядь буретш төдмасисны «шө» *шыпасён*. Лөня и гора *шувалісны* [ш] *шы*. Пөв вылын серпасалөма яръягыд *шонді*. Челядь *шаня* пукалісны да *шувалісны шонді* кыв дінө лөсялысь мича кывъяс: югыд, яр, зарни, син ёран, дзирдалан. Сэсся велөдчисны тэрыба *шуваны* кывпесан: *Шонді* ставсө *шоньда шонтө*.

Велөдчысьяс *шыөдчисны шонді* дінө, медым сійө пыр *шонтіс* да нюмъяліс:

Югыд *шондіөй, шоньдсө*

Өдйө вай, өдйө!

Шондіөй, югыдөй,


Югөрсө кисьт тэ вай, кисьт!

Шыпаслы сьөлөм вылас воис *Ширяева* Машалөн *шонді* йылысь кывбур висьталөм. Сійө и *шензьөдана* мичаа сёрнитіс. *Шань* Маша-ыд *школа* пыртөдз нин төдөма *шыпасъяс* да кужөма лыддысьны. Гортас сійө велөдө Мишук воксө колана ногөн *шуваны шыяс* да лыддысьны.

Урокъяс костас челядь *шойчисны*. Налөн *шаньмис* сьөлөмныс *шырөн-каньөн* ворсөмысь.

Урокъяс бөрын Маша корис **Ш** шыпасөс гортас. *Шома шыд* да рок сөйөм бөрын Маша да Мишук ворсісны *школаысь*. *Шыпас шемөсмунөмөн* кывзіс, кызди Мишук вайөдаліс кывъяс, көні [ш] *шыыс* сулаліс кыв водзын (*шкап, шарп, шонді*), кыв шөрын (өшка-мөшка, эшкын, пышкай, кушман) да кыв помын (ош, куш, кыш, көш). Вит арөса зонкалөн шыпасъяс төдөм – тайө ыджыд *шөдөдөм-тор*. **Ш** шыпас да Маша *шашкиасисны*, ичөт Мишук ворсіс *шегйөн*.

Ш шыпас серпасаліс нюмъялысь *шонді*, мед пө тайө серпасыс коляс Машалы да Мишуклы казьтылөм вылө.



Буско! Буско! Татчө...



Б б шыпас

Өтчүд шыпасъяс ыстисны **Б** шыпасөс Ыб сиктө Анна *баб* дорө вурунла. **Б** шыпас *Буско* понкөд мөдөдчис Ыблань. Пон то кольч-чылас *бөрө*, то котөртас водзө. Шыпас мунис ю *бокти*, а *Буско* котөртис кыркөтшысь *буждом* лыа вывти. Луныс вөлі *букыдкодь*.

Со и *бابلөн* керкаыс. Керка *банладорас* *быдмө* *быдсяма* дзори-дзыс. Сэни лэбалөны *бобувъяс*. Керка вылас *бергалө-жбыргө* жбыр-ган. Град йөрас *бөрөздасянь* *бөрөздаөдз* колялөма *боръяс*. *Боръяс* *быдмөма* *бобөнянь*. Керка саяс сулалө пашкыр *бадь*. Сэни некы-мын ыжа-*балая* котралөны да *баксөны*: «*Бэ-э-э!*»

Анна *бабыд* *бура* найөс *бабитө*. Сийө пыраліс амбарө, вайис шыдөс да гортса пемөслы *босьтчис* пуны сөян. Тайө здукө кыскө лэбзис паськыд *бордъя* варыш. *Буско* уськөдчис варыш вылө. Лэ-бачыд *бөр* лэбзис-пышйис вөрлань.

Б шыпас *бергөдлыштіс* амбар дорысь ытшкөм *бобөнянь*. Амбар *бокын* лөня *боргис-визувтіс* шор. Шорсянь неылын ворсіс Анна *бابلөн* *Борис* нима внукуыс. Друг кыліс зонкалөн повзьөм горөдөм: «*Бабуш, вө-ө-я!*» *Борисыд* шорө усьөма, а *бөрсө* *берегө* кайны сьөкыд.

Б шыпас чуксаліс понйөс: «*Буско! Буско!*» *Буско* уськөдчис шор-лань да кыскис *Борисөс* *берегө*. Зонкалөн сапөг пытшкас *болсакыліс* ва, гач-дөрөмыс *брөд* ва, көть пыдзрав.

– *Бр-р-р! Бабук!* Төдлытөг өд уси, прөстит! – *бөрдана* гөлөсөн ко-рис прөща ымралысь *бандзиба* зонка.

– Сө пасибө тіянлы *бурторсьыд!* – аттьөаліс Анна *баб* **Б** шы-пасөс да *Буско* понйөс. – Сэсся видзөдліс внукуыслань да содтіс:

– *Бур ногөн* өд колө и овны, и ворсны, *Борис...*

Анна *баб* сетіс шыпаслы вурун.

– *Бур* туй, тіянлы!



Дивё да и сёмын!




Д Д шыпас

Шыпас грездын ставөн *дасьтысьёны* төв кежлө. *Демьян дядь* ичөт д шыпаслы исласян пу *дадь дасьтёма*. Шыпас *долыдпырысь* мөдөдчис *дадьла*.

Том дырйиыс *Демьян* нимавлёма бур *дорчысьён*. А өні гортас пуысь да сямөдысь вөчасьё. Керка бокас сувтөдалёма вель уна *дасьтём* пөв. Торъя уджалан жырйын мыйыс сөмын эз вөв! *Демьян дядь* төв кежлө вөчёма турун да пес кыскалом вылө ыджыд *додь*. Синмө шыбитчис корадодь. Джаджйын сулалісны пуысь вөчөм *дозмук да кудгяс*. Мастерыд некымын куд серөдөмөн вундалёма. Өти куд *дорвыв* мичаа серөдөма көр мыгөръясөн. *Дивө* да и сөмын!

Демьян динө деревнясаяс тшөкыда волывлөны: корөны мыйкө пуысь либө сямөдысь вөчны. *Дон* босьттөг сійө дзоньталө то зыр, то куран. Олөмыд пө тай быдөнлы ассьыс *дон* сетас. Быдөн бур кывйөн аттьөалөны *Демьянөс*. А бур кывнад и уджыд шедөджык, лолыдлы кокниджык.

Демьян козьналіс д шыпаслы пу *дадь*. Шыпаслөн сьөлөмыс *до-лыда* ёкнитіс. Шыпас пөся аттьөаліс *дона* козинысь да *дөвөльпы-рысь* мөдөдчис Шыпас грездө.



Тайо тyas уна чери овло!



Т Т шыпас

Т да Д шыпасъяс важысянь нин ёртасьöны. Сöмын неуна *торгялыштöны* öта-мöдсьыс: Т шыпас лöня сёрнитö, а Д шыпас – гораджык гөлöса. Т шыпаслөн медся радейтана удж – чери кыйöм.


Тöлка Т шыпаслы быдтор окота *тöдны*. Сийö *тöдис* чери оланінъяс. Öти гожся асылö босьтис вугыр шатин, сёянтор, *туисö* ырöш, чуман да мөдöдчис Сьод *ты* дорö. Нюр боктi мунигөн вотыштис *турипув*. *Тодысь* аддзылис *туриöс*.

Ворса *туй* нуöдис *тылань*. Шыпас *тивксёдис* Сьод *ты* дорöдз. Со и *тöдсаин*. Ты вывтi кывтис утка котыр. Ылын *тыдалис* пыж. Öтка морт *тивгясис* пыжсянь. Шыпас чöвтис вугырсö ваö, видзöдис *таб* бөрся, *терпитöмөн* виччысис, кор самасяс вугырö чери. Чöвлөнъ.

Друг кылис *тиралан* гөлöсөн горöдöм: «Мездöй!!» Пыжсянь *тивгясъысь Тикöйд* усьöма ваö. Көсийö кайны бөр пыжас, но *тивйыс* пыр ёнджыка гартчö сы кокö.

Дыр мөвпавны вöли некор. Т шыпас сунис ваö да *тэрыба* вартчис пыжлань. Кыкнанныслы ковмис ёна *тильсьыны-мырсьыны*, медым мездысьны дзугсьöм-гартчöм *тивйысь*. Кыкөн сынисны береглань. Шыпас сетис асьыс кос паськөмсö. Пестисны бипур, косьтысисны. Тикөн *такалыштис*. Тöлкөн-ладөн сёрнитыштисны. *Тихон Трофимович* сиктын бур *трактористөн* нималö, *том* йöзöс тайö уджас велöдö. *Тарас* да Борис пияныс вöсна *тöждысьö*. Найö батыслысь *туйсö талайлöны* – *тракториставны* велöдчöны.

Тикөн корис шыпасöс öтув *тивгясъыштны*. Кыкнад регыдъя кадөн вель уна чери кыйисны. *Тöдлытöг* лэбыштис луныс. Рытланьыс нин Т шыпас чери *тыра* нопъя воис Шыпас грездö.



Вөр – сійö мян озырлун да мичлун.
Сійöс колö быдöнлы видзны.



В В шыпас


Шыпас грездын олө зэв *визув* **В** шыпас. Сылөн радейтана гортса пемөс –*вөв*. Шыпас бура *ветлис верзьёмөн*, *весиг* ордйысьёмын *вөліны* ыджыд *вермёмгяс*. **В** шыпасөс ёртгясыс радейтисны *веськыдлунысь*, *винёвлунысь* да *вежавидзана* олөмысь.

Өтчыд сійө *визиркаөд* *веськыда* грездлань *вөлі* мунө. Ылісянь нин **В** шыпас казяліс чотысь мортөс. Киас бедьтор босьтөма да ньөжйөникөн мунө. Шыпас сувтөдіс *вөвсө*. Тайө *вөр видзысьдөзьөр*итысь *Василей* *вөлөма*. Тодйөд мунігас лёкног *воськовтөма* да коксө музгыльтөма. Муннысө *вын-эбөсыс* нин бырөма.

Василей дядьөс шыпас пуксьөдіс *вөв* *вылө*. Кыкөн рөдтісны векни ордымөд. Ордым *вайөдіс* *вөр* керкаөдз. Керкаыс *вөлі* *важкодь*. Сійө сулаліс зэв мичайнын, шор бокин, өти ичөтик өшиня. Пытш-кас пач, пызан, лабич. Шыпас топыда көрталіс *висьысьлысь* доймөм коксө. Сэсся ломтіс пач да пуис сёянтор. Сюрис и *вөлөгатор*. Сёйөм бөрын шыпас *вильмөдіс* *вежыньтчөм* пызансө, *вөчис* пуклөс.

Василей *варовмис*, *висьтасис* зэв колана *вөр* *видзан* удж йылысь: и *визиркатө* *весалө*, и том пу садитө, и *вөрсө* сотчөмысь *видзө*. Таысь кындзи аслыс *видз-му* *вөдитө*. *Веськыд* мортыд сёрнитіс *велөдана*: *вөр* – сійө мяян озырлун да мичлун. Сідзкө, сійөс колө быдөнлы *видзны*.

Шонді саяліс *вөртас* сайө. *Вольсасисны* да *водісны* узыны. Мөд луннас **В** шыпас *висьысьөс* нуис сиктса больничаө. *Василей* аттьөаліс шыпасөс *отсалөмысь*, сие шыпаслы *виль* *вермёмгяс* и *велөдчөмын*, и *вөв* *вылын* ордйысьёмын, и уджын.



Йора чуктөдiс аслас паськыд сюрсыс нейджыд тор да сетiс «Й» шыпаслы.



И И шыпас

Өтчүд шыпас грездө локтис выль **И** шыпас да овмөдчис кык өшина нейджыд керкаө. Тайө шыпасыс **И** шыпаскөд өткодь. Сөмын **И** шыпаслөн юр вылас ичөтик аслыспөлөс пас. **И** шыпас сылыс гора мыла гөлөсөн, а **И** шыпас – небыдик гөлөсөн.

Өтчүд **И** шыпас мунис раскө корось вундавны. Шыпасылдөн юр-вывса пасыд пысасис пу увйө да жугалис. Шогө усис **И** шыпас: кызди нө өни мөдасны *йөзыс* торйөдны менө **И** шыпасысь?

Пуксис шыпас туй бокө. Шогысла бөрддзис, синваис тюрөбөн мөдис петны. Бөрдөм шытө кылис *йөра*. Тэрыб кокнас здукөн и воис шыпас дорөдз. **И** шыпас *йөжгыльөн* пукалис да чышкалис синвасө. Шыпас висьталис *йөралы* аслас шог йылысь. Вөрса пемөс гөгөрвоис шыпаслысь майшасьөмсө. Недыр мөвпыштөм бөрын йөра чуктөдис аслас паськыд сюрсьыс нейджыд тор да сетис шыпаслы.

– Новлөдлы ме моз тайө пассө юр вылад. Татшөм мыгөрнад некод нин оз сорав тэнө **И** шыпасыдкөд.

И шыпаслөн олөмыс *йиджтысьөма* вөр-ва да пемөсьясөс радейтөмөн. Вөр-ва видзөм *йылысь* сылысь гижөдьяссө унаысь нин *йөзөдлисны*. Шыпас перйис нопсьыс нянь да сов. *Йөра* азыма нюлис шыпас кийсь совсө.

Паськыд сюра пемөс отсыштіс корсьны шыпаслы корось вылө мича пу вожьяс. Кыкнад тэрыба вундалисны нөб тыр пу вож. Шыпас пөся аттьөалис *йөраөс* отсөгысь да неминуча бырөдөмысь. Юр вылас лөсьыд паса **И** шыпас мөдөдчис Шыпас грездө.



Помтём-дортём паськыд ота коми парма!



Ш П шыпас


Шыпасъяс ас удж, кыйсьом да вөралом *помысь* и олөны. Ёрта-сьысь **Б** да **П** шыпас – *писькөс* вөралысьяс. **Б** шыпас Буско *понкөд* ветлө вөрө. **П** шыпаслөн ёртыс – *Пума* пон. **П** шыпасөс радейтисны сылөн веськыдлун, *пельклун да писькөслун понда*.

Талун **Б** шыпас *пелькөдө* шыпасъяслысь олан жырсө. **П** шыпас асывсянь нин дасьтысис вөравны: босьтис *пищаль, пестер*, тасма костас суйыштис *пурт* да чер, нопъяс босьтис *пөрт* да *пөжастор*. Мөдөдчис шорлань. Вуджис шор вомөн важиник кер *поскөд*. Сувтовкерліс да черөн лосьодыштис *поссө*, мед пө некод оз усь. Недыр муныштөм бөрын воис *понөля* вөр, сэсся *прөсека*. Бокө вештис туй вывсьыс *пөперегалөмөн пөрөм пожөм пу*. *Пөрөмаинти* мунны вөлі сьөкыдджык. Кузь туй *прөйдитөм* бөрын пуксьөмөн шойччыштис.

Пума котөртис водзын. Шыпас сюся видзөдаліс гөгөрбок. Нюрбокын вотчисны кыкөн. *Петыр да Павел* веськалөмаөсь мырпомайнө да өдйө и тыртөмаөсь дозъяснысө. **П** шыпас тшөтш жө чөсмасыштис юмов мырпомнас.

Вокъяс вотөс тыра дозъяснысө пукталісны нопъясө да мөдөдчисны гортлань. *Пума* водзын котөртө, туйсө мунысьяслы индө. Нюрас мунигөн на *Павел* вокыс шор вомөн вуджигас коксө көтөдөма. Нюрад нөшта на көтасьөма сылөн кокыс. Кок *пытшкас* ваыс *польскакыліс*.

П шыпасыдлөн нопъяс кос носки вөлөма. Сійө сетис зонкалы носкисө. Зонка *первойсө падъялыштис*, но сэсся босьтис, аттьөаліс шыпасөс. Кос носкинад *пыр* жө лои кокыслы шоныд. Зонка чужөм вылын *паськаліс* нюм. Өзтисны бипур. Нырө *паркнитис* тшын дук. *Павел* косьтис ва сапөгсө. *Пөртйын* пуисны чай. Юисны сэтөра *пөсь* чай, сөйыштисны *пөжас*, шонтысьыштисны. *Пансис* сёрни. Воисны өти кывйө: *пармаад* мөдөдчигөн нопъяд век колө *пуктыны* кос *паськөм*. Шойччыштөм бөрын *подөн* мунны лои кокниджык. «*Прөста* өд оз шуны: *пөт* кынөмнад и кузь туйыд *пө* дженъыдджык», – шмонитыштис шыпас да индіс *пашкыр пожөм* вылысь *пас* вылө. Тайө нюрысь *петан* туй. **П** шыпас да *Пума* *пелька* восьлалісны *пармаса* сөстөм ёльлань. Сэні лэбач-*пөткаыд* уна овлө. Кыйсьысь водзын воссис *пөттөм-дөртөм паськыд* ота *парма...* *Пемдандорыс* нин шыпас уна *прөмысөн* воис гортас.



Лабутной «Л» шыпас тэрыба котралё лыжи вылын.



Л л шыпас


Шыпас грездын оліс **Л** шыпас. Тайё шыпасыс вөлі лабутнөй, быдтор *лючки-бура* вөчліс, *лөсяліс* сямнас мукөд шыпаскөд. **Л** шыпас тэрыба котраліс *лыжи* вылын. Сійөс унаысь нин корлісны ордйысьны.

Төвся кадө Шыпас грездса олысьяс радейтісны *лыжиөн* да даддьөн исласьны. Грездсянь неылын эм кыр. Өти төвся *лунө* ыджыд **Л** да ичөт л шыпасъяс мунісны кыр дорө. Ыджыд **Л** шыпас ислаліс *лыжиөн*, а ичөт л шыпас – даддьөн. Тани жө ордйысисны велөдчысьяс.

Медводзын котөртіс *Лариса*. Но мый нө тайё? Кыр бокті котөртігөн сійө джөмдіс, *лыжиыс* трачмуніс.

Тайё здукө кыр бокын ислаліс **Л** шыпас. Сійө тэрыба пөрччис *лыжисө* да сетіс *Ларисалы*. Нывка тэрыба *лыжиасис* да котөртіс водзө. Сійө *личлэдзлытөг* уджаліс, содтіс вын-эбөс, морөс тырнас *лолаліс*. *Ларисалөн* сьөлөмыс *личалыштіс*: ордйысьысьяс пөвстын сійө бара лоис медтэрыбөн.

Нывкалөн мудзөмысла *лигышмуніс* ки-коkyс, но *личмуніс лолыс*, сьөлөмыс долыда ыпгьяліс. Недыр кад кольөм бөрын кыліс тренерлөн ошкана сёрни: «Молодеч, *Лариса!*» Тренер *Леонид* Иванович да *Лариса* пөся атгьөалісны **Л** шыпасөс, өд тайё вермөмас и шыпаслөн эм пай.



Енбиа «Е» шыпас зэв мичаа сьылö да йöктö.



Е е шыпас

Шыпас грездын оліс *енбуа* **Е** шыпас. Сійö зэв мичаа сьыліс, йөктіс, кужис мастера серөдөмөн вышивайтчыны.

Емдінын дасьтысисны коми небөглы сіөм празник кежлө. **Е** шыпас юрнуөдөм улын сьылысь-йөктясь шыпасъяс велөдісны мыла сьыланкыв.

Елькина Маша ичөтсьянь нин артисталө. Ассьыс сьылан сямсө петкөдліс **Е** шыпаслы. Шыпасыдлы сьөлөм вылас воис нывкалөн и йөктөмыс, и сьылөмыс. Мамыс Машуклы вурис *енэж* рөма сарапан. **Е** шыпас пысаліс *емө еджыд* сунис да мичмөдіс сарапансө серьясөн.

Праздник вылын гөрд платтьөа шыпасъяс гораа сьылісны некымын сьыланкыв. Лөза-турунвижа паськөма шыпасъяс: Б да П, Д да Т, З да С, Г да К, Ж да Ш – кыкөн-кыкөн тэрыба йөктісны коми кадрий. Быдөнлысь сьөлөмсө вөрзьөдіс Машуклөн сьылөм-йөктөмыс.

Вьль велөдчан воө *Елькина* Маша сьывны велөдчыны муніс юркарө.





Пөрись пöль пöся аттёалис шыпасёс отсöгысь да козьналис
сюмöдысь вöчöм пестер.



Б (небыд пас) шыпас

Шыпас грездын кык ошина керкаын оліс **Б** шыпас. Тайо шыпасыс *восьса сьолёма*, сёрнитө небыдика, йоз дорө сибалө. **Небыд пас** быдөнлы воо *сьолём вылас* аслас небыдлуннас да төждлуннас.

Небыд пас уна во чөж *төждысьо* өти *пөрысь пөль* вөсна. Грезд-саяс сійөс *Даньё Васьөн* шуоны. Өтнадлы, дерт, *сьөкыд* овнытө. Но *пөль* пыр мыйкө вөчө-пелкөдө. Төв кежлө *дасьтөма лызь, додь*. Гожөмнас *дасьтөма корөсь*. **Небыд пас** и талун локтіс *Даньё Вась* ордө. Шыпас *лызьөн* ветліс гөлик *ньөрла, мыськаліс тасьті-пань, гөбөчысь* лэпталіс *нырсьөдөм* вылө *картунель*. *Пөль* пөся *аттьөалис* шыпасөс *отсөгысь*. *Козьналіс* **Небыд паслы** *сюмөдысь* вөчөм пестер. Пестерыд мышку вылад пө оз мешайт вөрті ветлыны. А пестерад и тшакыд оз *жуглась*, и вотөсыд оз *нырсьы*.


Грездса шыпасьясөс **Небыд пас** шемөсмөдіс унаторйөн.

Өти-кө, **Небыд пас** вермис вежлавны кывъяслысь вежөртассө: *пас кывйысь* артмөдө *пась* кыв; *кыз* кыв вермө вежны *кызь* кывйө.

Мөд-кө, **Небыд пас** квайт *шыпаслысь* петкөдлө небыдлунсө.

Небыд пас кыліс *гольөдчөм шы да восьтіс* өдзөс. Сы діно локтісны Д, З, Л, Н, С, Т шыпасьяс. Квайт шыпас да **Небыд пас** ворсыштисны. Медводз найө шуалисны *ассыныс* чорыд шыяс: [д], [з], [л], [н], [с], [т]. Кор быд шыпас дорө матыстчыліс **Небыд пас**, шыпасьяс шуалисны небыд шыяс: [дъ], [зь], [ль], [нь], [сь], [ть].

Шыпасьяс вөчисны кывкөртөд: **Небыд пас** шыпаслөн зэв ыджыд коланлуныс Анбурын.



Гудокасыгы «Г» шыпас гажөдіс йөзөс.

Г Г шыпас

Шыпас *грездын* оліс *гажа гудокасыыс* Г шыпас. Сійө радейтис *гажөдчыны* да *гажөдны йөзөс*. *Гудокыс* сылөн и олан *гажыс*.

Оз өд прөста шуны: *гажаа пө овсьө*, *уджыд кө бура вөчсьө*. Шыпасъяс *кужисны* и *уджавны*, и *гажөдчыны*.

Ссыланног лөсьөдыс *Григорий Васильевич Габов* корис шыпасъяслыс *«Горадзуль»* котырөс *«Шондібан»* праздник вылө. Г шыпас *гудокасьөм* улө унаөн сылысны да йөктісны. Ставлы воис сьөлөм вылас том сылыс *Дашук*. Медся ёна *гажөдіс* ставнысө Г шыпас. Сійө некымыныс *вежліс ассыс паськөмсө*. Медводз йөз водзө петіс *гартчыс* юрсия, *паськыд гача*, *гудөка* Г шыпас – *Гудөк Гень*. Быдөнлөн петіс *гажа* нюм. Сійө *гөлөс* *вежлалөмөн* сылыс *шмонитана* *ссыланкывъяс* да *тешкодя гогйөдліс* юрнас. Йөзыс *гигзисны-сералісны*. Ссыланкыв помалөм бөрын Г шыпас тэрыба пасьталіс *платтьө* да лои *Гудөк Граняөн*. *Гораджыка* ызнитіс *серам*.

Гажлун кыссис сёр *рытөдз*. *Гудокасьөм* улө шыпасъяс *мөдөдчисны грездлань*. *Гулыда* йөлөгааліс ывлаын *гора* сылөм.



«Я» шыпас радейтис ветлыны ягдорса раскё ягсерла.



Я Я шыпас


Я шыпас радейтис ветлыны тшак-вотöсла матыс *ягö*. Уна вонад ветлиг-муниг сийö тöдис вөр-валысь гусяторъяс.

Водз асыв чумана-пестера **Я** шыпас мөдöдчис *ягдорса* раскө *ягсерла*. Енэжын ломалис *яргюгыд* шонди. *Ягыс* кыпыд да гулыд. Недыр ветлөдлыштөм бöрын мудзсö личöдны шыпас пуксис *яла* вылө. Тыр морöснас апалис *ягвывса* сөстөм сынөдсö.

Шойччыштөм бöрын мөдöдчис раслань. Со и рас. Тшакаинысь вотис *ягсер* бöрся *ягсер*. Тшак тыра пестерөн да чуманөн шыпас корсис петан туй. Неылысь *явö* кылис горөдөм: «Коля!» Тшак вотьсяслөн гөлөсьяс *ясыдмисны*. Тайö жö раскас вотчис *Яков* Коля пиыскөд. Сийö велөдчис медводдза классын. Коля *яндысьöмпырысь* юксис шыпаскөд аслас шогөн: öшыбкаясөн пö гижа **а** да **я** шыпасъяса кывъяс.

Я шыпас корис Коляös Шыпас грездö. Зонка тöдмасис гөрд рёма керкаын олысьяскөд. Накөд сёрнитөм бöрын бура гөгөрвоис йоталөм шыпасъяслысь аслыспөлөслунсö. Öни Коля төдö: **Д, З, Л, Н, С, Т** шыпасъяс бöрын **Я** шыпас петкөдлө согласной шыыслысь небыдлунсö.

Яков да Коля пöся аттьöалины **Я** шыпасös төдөмлун да кужөмлун содтöмысь.



«Ю» шыпас окотапырысь юксьö аслас тöдöмлунöн да йöзöдö газетын выль юöрьяс.



Ю Ю шыпас

Ю шыпас аслас грездын югдөдiс-велөдiс мукөд шыпасъясөс, окотапырысь юксис аслас төдөмлуннас, газетын да небөгъясын йөзөдiс юргъяс. Ю шыпас ёртасис У шыпаскөд.

Шыпас кывлiс Юркина Юля йылысь сьөлөмө йиджан юөр. Сылы окота лои аддзысьлыны тайө нылыскөд. Ю шыпас мөдөдчис матысса грездө.


Туйыс мунiс Сыктив ю пөлөн. Юбердса видзяс турунаөсь. Шондi лышкыда койис ассьыс югөрсө да югдөдiс югидвиж рөмөн видзсө. Ю шыпас ставнас югвидзис радлунөн.

Юсянь неылын эм ты. Тайө тысө радейтөны лэбач-пөтка. Шыпас казялiс шемөсмөдана серпас: ва веркөстiыс кывтiс өтка еджыд юсь. Юсьлы өвтiс ты бокин сулалысь нывка. Шыпас матыстчис нывкалань да шыөдчис сы дорө. Юасьом-висьтасьом бөрын шыпас төдмалiс бур сьөлөма йөз йылысь, ветлiс юасьны Юркина Юля бать дорө. Мөд луннас «Коми му» газетысь шыпасъяс лыддисны «Юсьлөн выль олөм» юрнима гижөд.

Өти арся лунө Арсей мунiс вөравны. Воис ты дорө. Ылын кылiс лунвылө лэбысь турияслөн нор горзөмыс. Со и юсь котыр лэбө шоныдiнө.

Ты дорысь Арсей казялiс өти юсьөс. Кутшөмкө лөк морт лы-йөма лэбачтө. Бордыс коньөрлөн доймөма. Абу вермөма юсьыд мукөдкөд лэбны ыли туйө.

Арсей вайис юсьсө гортас. Юля төвбыд бура дөзьөритiс висьысь лэбачөс. А тулыснас бурдөм юсьтө батя-ныла бөр нуисны ты дорө. Тадзи бур сьөлөма Юркинъяс сетiсны юсьлы выль олөм.



«Ё» шыпас радейтö вуграсьны. Сылы шедіс сьöd визя ёкыш.



Ё ё шыпас

Ё шыпас мукөдсьыс торъяліс аслас ёнлуннас. Дзоньвидзалун ёнмөдөм могысь сійө быд асыв котралө.

Ё шыпас ёртасьö О шыпаскөд. Кык шыпас бура вөчасьöны сөйысь. Быдөнлы сьөлөм вылас воö шыпасьясөн сөйысь вөчөм уна сикас доз да чача.

Öти төвся лунö Ё шыпас муніс ты дорө вуграсьны. Вөчис йөрдан. Дыркөдь вуграсис. Шыпаслы шедіс ёкыш да куим ёді. Кыйөм черисö ёкмыльтіс да мөдөдчис вадорті гортланьыс.

Тайö кадö йи вывті конькиөн исласис Ёгор. Друг зонка вошис шыпас син водзысь. Кыліс ёся горөдөм. Ё шыпаслы тайö горөдөмсьыс ётшкис сьөлөмас: Ёгорыд веськаліс йөрданас, вермас вөйны. Матысса зорөд бокысь кватитіс зор, тэрыба котөртіс йөрданлань. Ёгор ёна кутчысис зорйө, а Ё шыпас кыскис зорсө асланьыс.

Ён Ё шыпас кыскис ас вылас Ёгорөс грездөдз, пасьтөдіс шоньд кос паськөмөн, юкталіс маа чайөн. Ёгор йөрдана ты вылын некор сэсса оз понды исласьны. Шыпас да Ёгор өнөдз на ёртасьöны, өтлаын вуграсьны ветлөны, ёрта-ёртыслы отсасьöны.



«Ж» шыпаслөн сьёлöмыс жаляддза топавліс.
Жеб доймöм жоньыд эз вермы шенасьны борднас...



Ж Ж шыпас

Кык судта керкаын оліс гора гөлөса **Ж** шыпас. Тайö жö керкас улыс судтаас оліс **Ш** шыпас. Шыпасъяс төждысисны лэбач-пöтка вöсна.


Öшинь улас шыпасъяслөн быдмис и *жов* пу, и пельсь пу, и льöм пу. *Жытник* дорас сулаліс пашкыр кыз пу. Көдзыд төвъяснас шыпасъяс пөвйысь дасътивлісны лэбачьяслы сёянін да öшөдлывлісны вөчөмторсö кыз пу вылö.

Öти көдзыд лунö **Ж** шыпас зырийөн весаліс *жытникдорса* туй. Көдзыдысла туй южыс кок улас тронякыліс. Көдзыд пондаыс сугаыс весиг *жуньгис*. Дыркодь лым зыртöмысь шыпас *жуявмөн* мудзис.

Гортсьыс петкөдіс лэбачьяслы сёянтор. *Жбыр-жбор* лэбисны *жоньяс* да пыстаяс. Öти *жонь* колис пукавны пу вылын. Көсйис эськө лэбзыны, өвтыштіс борднас, но *жботкысис*-усис лым вылö.

Оз тай прөстö шуны: көні эм *жальлун*, сәні эм бурлун. **Ж** шыпаслөн сёлöмыс *жаляддза* топавліс. *Жеб* доймөм лэбачыд эз нин вермы шенасьны борднас... *Жалитөмнад* өд он отсав. Шыпас ньöти *жуйявтөг* лэптіс *жоньөс* лым вылысь да пыртіс аслас *жырийө*. *Жоньыд* шоналыштіс, збоймыштіс. **Ж** шыпас сетіс лэбачлы сёянтор.

Некымын лун мысти *жонь* мөдіс *жбыргьявны*-лэбавны, корсис петанін. **Ж** шыпас гөгөрвоис: *жоньыдлы* гажтөм өртъястөгыс. Сійö востіс өдзөссö: лэб пö ывлаө, но көдзыд кадö да тшыгъялігад вольв пö гөститнытö!



«Ч» шыпас ёлысь чибльөгөн юис чöскыд васö
да чожа мөдöчис водзö.



Ч Ч шыпас

Грездын олысь **Ч** шыпас зэв *чож*. Сійö зэв нин важысянь мөвпаліс грездса музей йылысь. Шыпас уналаö ветліс сы могысь, медым төдмавны важ йөзлысь оланногсö да уджаланногсö.

Водз асывнас **Ч** шыпас мөдөдчис орчча сиктö. Сэні олісны *Чупров* гозъя. Найö *чужан* сиктас олöны нин көкъямысдас вит во.


Поводдяыс мича. Гораа *чирксісны*-сыылісны *чиркзяс*, юр весьтын *чівөстліс* сырчик. Горшсö веськөдны шыпас кежаліс вөрса ёль дорö. Ёльсьыс *чибльөгөн* юис *чөскыд* ва да *чожа* мөдөдчис водзö. Туй *чукыль* сайын тыдовтчисны керкаяс.

Сиктсаяс помалісны *чөвтны* турун, нюмъялісны: талун пö *чомöрасям*. Шыпас тэрмасис олöма йөз дорö. **Ч** шыпасöс кильчö дорын *чолөмаліс* пöрысь пöль. Сиктсаяс сійös, *чөскыд чери* кыйысьös, шуöны *Чими* Васьөн. Керка бокас *чукөрөн-чукөрөн* быдмисны *чуймөдана* мича дзоридзьяс. Найös киськаліс *Чупровзяс*лөн Даша внучкаыс.

Пöчö ставнысö *чукөстіс* керкаö. Шыпас *чöла* видзөдаліс фотографияяс. *Чөв-лөньсö* торкис пель *чунөдана* шы. Шыпас *чатөрөн* видзөдліс стенмас öшалысь кузь кывъя *часі* вылө.

Пызан сайын пöчö *чөсмөдліс чериняньөн*, *чипан* яя шыдөн да *чими чериөн*. Сөйөм-юөм бөрын шыпас *чепняөн* лэпталіс ва да новліс пывсянö. Пывсян ломтысигкості сійö *чарлаөн* вундыштіс потшөсбокса турун, *черөн* дзоньталіс важмөм потшös.

Пывсьөм бөрын *Чупровзяс* дыр казътылісны важся олөм да уджалөм йылысь. Олөма йөз вит *челядьös* быдтөмаөсь, *чеччөмсянь* тшөтш уджавлөмаөсь. Шыпас грездса музейö пöч да пöль вичмөдісны важ көлуй: печкан да *чөрс*, кринча, гырнич, пельса, гыр, вор, сямөд *чепня*, *чуман*, пестер, пач зыр, мича серөн вышивайтөм ки *чышкөд*. **Ч** шыпас пöся аттьöаліс пöч-пөльös, корис Шыпас грездö гөститны.



Гөгөр ловзьюма, ывлаыс нюмъялө.



Ь (небыд пас) да Ъ (чорыд пас) шыпасъяс

Небыд пас да **Чорыд пас** шыпасъяс олісны кык *жыръя* керкаын. Коть ота-модсьыс найо и *торъялісны*, но ладон олісны, юкисны *медборъя* нянь торсо. **Чорыд пас** сёрнитіс лоня, но чорыд гөлөсөн. Корсюрө шыпаслы ковмывліс и чорыдавны, медым эз пөвадитчыны лёк нога *олысъяс*.

Талун кык шыпасос виччысисны сиктса школаын. Буретш первой класса *велөдчысъяс төдмасьоны* **Небыд** да **Чорыд пасъясөн**.

Школао мунігөн *шыпасъяс* казялісны: гөгөр *ловзьёма*, ывлаис *ньюмъялө*. *Лунвывсянь пөльтө* небыдик төв. Туй кузяла *писькөдчөны* варов *шоръяс*. Керка *вевтъяссиянь* виялө войтва. Кылө *лэбачьяслөн* гора *дзользьөм*.

Со и сиктса школа. *Шыпасъяс* төдмасисны медводдза класса *велөдчысъяскөд*. Челядь бура нин *лыддьысьоны*. Найо көсийоны бурджыка гөгөрвоны: кор гижны *торйөдан пасъяс*.

Небыд пас *висьталіс челядьлы* ас йывсьыс: Небыд Д, З, Л, Н, С, Т, Ч согласнойяс бөрын -ЯС водзын колө гижны **торйөдан «Ь»**.


Чорыд пас төдмөдіс *велөдчысъясөс* аслас гижанногөн: Чорыд согласнойяс бөрын -ЯС да йота Я, Ю, Е, Ё водзын колө гижны **торйөдан «Ъ»**.

Челядь ворсісны кывъясысь. -ЯС отсөгөн найо артмөдісны *эмакывъяс* да гөгөрвоөдісны налысь гижанногө:

сизь – сизъяс, жонь – жоньяс, коль – кольяс;

войт – войтъяс, шор – шоръяс, кор – коръяс.

Сэссия мусерпас вылысь корсисны сикт, посёлок да ю *нимъяс*: *Абъячай, Керчомъя, Озъяг, Изъюр, Везъю, Расъю, Човъю* да уна мукөд.



Шыпасъяс быд удж вöчöны öтув.



ТШ, ДЗ, ДЖ шыпасъяс

Куим жыръя керкаын олісны ӧтсӧгласӧн куим шыпас: **Дж**, **Дз** да **Тш**.

Быд жырйын пызан вылас *еджвидзӧ* сӧстӧм пызандӧра. *Джоджас* вольсалӧма мича серъяса *джодждӧра*. Кильчӧ помсӧ *дзимбырӧн еджыдӧдз* зыртӧма. Гӧгӧр *дзим-дзурк*.


Быд *ыджыд удж* вӧчӧны ӧтув. Гырысь *удж* эштӧдӧм бӧрын мӧд *удж* нин зіль шыпасъястӧ виччысьӧ.

Дз шыпас – бур гӧрысь-кӧдзысь. Сійӧ *водзвыв* дасьтысьӧ тувсов кӧдза кежлӧ. *Водз* асывсянь сӧр рытӧдз град вылын *дзӧрӧ*. Тшӧкыда вӧрын пилаӧн *дзужкйӧдлӧ*, пу пӧрӧдӧ да кер дасьтӧ. А сӧсся маши-наӧн журкнитлас вӧрад да ваяс дась пестӧ.

Тш шыпас сӧлӧмсянь пусьӧ-пӧжасьӧ. *Тшӧкыда* вӧдитчӧ гыр-ничӧн да кашникӧн. Сӧйысь вӧчӧм дозъясад сӧяныд дырджык пӧ оз *тшык*. Шыпас тӧдӧ уна *тшакаин*, зӧв ӧна радейтӧ *тшак* вот-ны. Сылӧн во кежлӧ дасьтӧма и косьтӧм, и солалӧм *тшактӧ*.

Дж шыпасыд водз асывсянь сӧр рытӧдз вӧчасьӧ торъя жыр-йын. *Уджач* шыпасыд кужӧ коса да чер воропавны, куран вӧчны, ва чуман да пельса мастеритны. Аслас грездса шыпасъяслы быд сикас *джадж* да кучик пуклӧса *джекъяс* вӧчалӧма. Ёртъясыс тшӧкыда шыӧдчӧны **Дж** шыпас дорӧ олан жыр дзоньтавны, ӧдзӧс дзиръявны.

Дженьыд кадӧн куим шыпас лӧптисны выль пывсян, *джоджалисны* гид. Шыпасъяс кодйисны дас метр *джуджда* юкмӧс. Грездса уна олысь юӧны выль юкмӧсысь *сӧдз* васӧ да аттьӧалӧны шыпасъясӧс.



«Ф» шыпас нималао бур снимайтчысьон.




Ф, Ц, Х, Щ шыпасъяс

Нель жыръя керкаё овмөдчисны нель шыпас: Ф, Ц, Х, Щ. Тайё шыпасъясые коми грездö воисны роч муысь. Шыпасъяселы сьолöм вылас воис коми йөзлөн оласногыс, налөн сёрниыс, лов кыпöда-на уджалöмыс. Роч шыпасъяс ёртасисны коми шыпасъяскөд.

Ф ф шыпас

Ф шыпас нималаё фольклор чукöртысьён да снимайтчысьён. Не-важөн шыпас паныдасьліс финн-йöгра котыркөд, вöчис налы миян озыр коми му йылысь уна сикас снимок. Ылі гөсьтъяскөд тшöтш ветліс фольклор театрö.

Ф шыпас ёртасис П шыпаскөд. Найö радейтісны ворсны кывъ-ясысь. Ф шыпас шуаліс роч кывъяс: фонарь, фанера, фартук, шарф, сарафан, шифер, туфли, конфеты, картофель. П шыпас шуаліс коми кывъяс: пöнар, панера, партук, шарп, сарапан, шипер, тупли, кампет, картупель.




«Ц» шыпас дасьтö концерт да гажöдö йöзöс.



Щ Щ шыпас

Щ шыпас уджаліс культура керкаын. Быд праздник кежлө сы юрнуөдөм улын шыпасъяс дасътивлісны концертъяс.

Щ шыпас тшөкыда воывліс гөсьтитны Ч шыпас дорө. Найө тшөтш ворслывлісны кывъяссыс. Щ шыпас шуаліс роч кывъяс: *улица, ситец, больница, огурцы, перец, цепь, кольцо, мельница, кузнец, гостинец, купец, ножницы, молодец*. Ч шыпас шуаліс коми кывъяс: *улича, ситеч, больнича, өгуреч, переч, чеп, кольча, мельнича, кузнеч, гөснеч, купеч, ножич, молодеч*.



Х шыпас серпасалис вөр-валысь мичлунсö.



Х Х шыпас

Х шыпас – *художник*. Сійö радейтö серпасавны вөр-валысь мич-лунсö. Шыпаслөн синмö шыбитчана мича рöма серпасъясыс некымынысь нин вöліны выставка вылын.

Х шыпаслөн медбур ёртыс – **К** шыпас. **К** шыпасыд недыр кадөн велöдіс роч ёртсö колана ногөн шуавны коми кывъяс. **Х** шыпас шуалис роч кывъяс. **К** шыпас петкөдліс, кызди колö шуавны коми кывъяс. **Х** шыпасыд зэв мичаа шуалис и рочöн, и комиён: *сахар – сакар, петух – петук, пастух – пастук, конюх – конюк, хозяин – кöзяин, ухват – укват, хоть – кöть*.





Щөголь «Щ» шыпас ньобис аслыс мича плащ да щотка.



ШЩ шыпас

Щ шыпас – грездса *щөгөль*. Сійө радейтө мичаа пасьтасьны, тшапа ветлөдлө. **Ш**шыпас велөдчис мича паськөм вурны. **Щ** шыпас дорө выль паськөм вуран могөн тшөкыда воывлісны мукөд шыпасьяс.

Уна во чөж нин **Щ** шыпас ёртасьө **Ш** да **ТШ** шыпасьяскөд. Коми йөз бура төдөны **Щ** шыпаслысь аслыспөлөслунсө: рочын тайө шыпасыс петкөдлө небыд согласнөй [*шь*], а комиын – чорыд согласнөй шыяс [*ш*], [*тш*], [*шш*].

Өтчыд куим шыпас: **Щ**, **Ш** да **ТШ** – мунісны ньобасьны лавкаө. Шыпасьяс лыддисны вузаланторьяслысь нимьяссө. **Щ** шыпас лыддис: *плащ, щөтка, ящик*. **Ш** шыпас лыддис комиён: *плаш, яшшик*. А **ТШ** шыпас лыддис: *тшөтка*. Куимнан шыпасыс ньобисны аслыныслы щөткаяс: **Щ** – паськөм весалан *щөтка*, **Ш** – пинь весалан *щөтка*, **ТШ** – ёг чышкан *щөтка*. А *щөгөль* **Щ** шыпас нөшта ньобис аслыс мича *плащ*.

Коми-роч кывчукӧр

Авъя – приветливый, вежливый, внимательный.

Азыма – с аппетитом

Бандзиб – щека

Бобӧнянь – клевер

Бор – межа

Бур мывкыда – хорошего поведения, порядочный, высоко нравственный

Визирка – просека

Вӧлӧгатор – пища, еда

Вӧртас – горизонт

Гулыда – громко, гулко

Гырнич – горшок

Джек – стул, кучик пуклӧса джек – стул с кожаным сидением

Енбиа – талантливый, одаренный

Енэж – небо, небеса

Ёді – лещ

Ёкыш – окунь

Жытник – хлебный амбар, житница

Жыр – комната

Жов – калина

Жонь – снегирь

Зі – оса

Зіб – шест

Ид – ячмень

Идӧр – аккуратность, бережливость

Идзас – солома

Истан – кулик прибрежный

Йиджтысьӧма – проникнута

Йӧзӧдлісны – издавали, время от времени публиковали

Йӧрдан – прорубь

Калич – запор, крючок

Карнан – коромысло

Кашник – горшок

Кеслач – послушный, исполнительный

Киподъя – мастеровой

Кырӧм – овраг

Лабутнӧй – степенный, серьезный, размеренный

Личлэдзлытӧг – беспрестанно, не перестывая, настойчиво

Лӧдз – вал сена

Мазі – пчела

Мышноп – рюкзак

Навӧлӧк – низменный берег реки

Неминуча – несчастье

Ниа – лиственница

Нӧрыс – холм, пригорок

Ордым – тропа

Ӧбича – нрав, характер

Ӧвад – овод; комары, мошки, слепни

Ӧтава – отава

Понӧль – хвойная поросль

Прӧмыс – добыча, пушнина

Прӧсек – просека

Рас – роцца

Рӧч – небольшое возвышение, бугорок

Сырчик – трясогузка

Сус пу – кедр

Сярган – погремушка

Такалыштны – немного успокоиться

Тод – болотистое место с низкорослым еловым лесом

Туис – туес

Уразнӧй турун – зверобой

Чепня – черпалка



Чирк – кузнечик
Чибльӧг – берестяной черпачок
Чими – сёмга
Чож – скорый, быстрый, резвый
Чӧрс – веретено
Ыб – возвышенность
Ыбкай – жаворонок
Ыжнёнъ – жимолость
Ырӧш – квас
Шег – козон, шегйӧн ворсны, иг-
рать в козны

Эж – поверхность
Эжа – дёрн
Эжтас – горизонт
Эжӧр – осока
Эзысь – серебро
Этшлун – поведение, характер
Юрним – заголовок, название
Явӧ – открыто, явно
Яг – сосновый бор
Ягсер – волнушка
Яла – ягель, олений мох

Коми анбур

А [а]

Б [bö]

В [vö]

Г [gö]

Д [dö]

ДЖ [джö]

ДЗ [дзö]

Е [e]

Ё [ë]

Ж [жö]

З [зö]

И [и]

і чута і

Й [йö]

К [кö]

Л [лö]

М [мö]

Н [нö]

О [о]

Ӗ [ö]

П [пö]

Р [рö]

С [сö]

Т [тö]

ТШ [тшö]

У [у]

Ф [фö]

Х [хö]

Ц [цö]

Ч [чö]

Ш [шö]

Щ [щö]

Ъ чорыд пас

Ы [ы]

Ь небыд пас

Э [э]

Ю [ю]

Я [я]

Для младшего школьного возраста

Полякова Эльвира Ивановна
Олісны-вылісны шыпасъяс
(*Жили-были буквы*)

Художник Елена Григорян

Редактор **Иван Белых**. Компьютерная вёрстка **Игорь Иванов**.

Подписано к печати 26.11.2007. Формат 70x100 1/16. Бумага офсетная 80 г/м².

Печать офсетная. Усл. печ. л. 6,45. Тираж 1000 экз. Заказ № 32728.



Издательство «Эском».

167982, Сыктывкар, ул. К.Маркса, 229.

Отпечатано в ООО «Коми республиканская типография»

167982, г. Сыктывкар, ул. Савина, 81.

